

informa TEO

EMPREGO O obradoiro Reforesta achégase ao seu ecuador con resultados xa visibles

O obradoiro de emprego Reforesta comeza a ter resultados xa visibles cando está a piques de chegar á metade dos seus nove meses de duración. Iniciado a finais de outubro, ata finais do vindeiro xullo este proxecto combina formación e emprego. Conta coa participación de oito alumnos e alumnas, que se forman e traballan na especialidade de 'Repoboacións forestais e tratamentos silvícolas', así como unha mestra e unha directora que tamén estaban en situación de desemprego.

Intervencións

Ademais da formación teórica, xa desenvolveron diversos traballos prácticos en contornas reais. Con eles adquiren experiencia e acometen iniciativas que benefician a comunidade. Unha das intervencións que xa efectuaron foi a roza da parcela da Piollosa e a súa repoboación con castiñeiros e carballos autóctonos. Ademais comezouse a traballar na zona do Xirimbao, onde se prevé a roza e a repoboación con carballos xunto á adecuación e ampliación dunha senda peonil, que xa se está realizando.

Que formación ofrece o obradoiro?

O obradoiro de emprego forma e recualifica as persoas que participan nel. Poden acceder a un certificado de profesionalidade destinado ao aproveitamento dos recursos endóxeos do sector forestal, que conta con gran presenza en Galicia. A este certificado completo súmase a impartición de dous módulos do certificado de 'Aproveitamentos forestais'.

O plano formativo do obradoiro inclúe tamén unha serie de contidos transversais para que o alumnado teña unha perspectiva máis ampla sobre



diversas temáticas. A prevención de riscos laborais, a sensibilización ambiental, a igualdade de oportunidades ou o proceso de creación dunha empresa son algunhas das materias tratadas.

Que obxectivos ten?

O principal obxectivo dos obradoiros de emprego é incrementar e mellorar as condicións de empregabilidade das persoas que participan neles. Tanto a formación teórico-práctica como o desenvolvemento de traballos prácticos reais contribúen a que o alumnado teña maiores opcións de conseguir un emprego. Durante o transcurso do obradoiro o alumnado dispón dun contrato laboral para a formación e a aprendizaxe •

Xa rozou e repoboou a parcela da Piollosa e iniciou tarefas semellantes no Xirimbao, onde se acondiciona unha senda peonil



BENESTAR

Marzo, o mes para as matrículas nas escolas infantís municipais

O prazo de matrículas para as Escolas Infantís Municipais, situadas en Calo, na Ramallosa e nos Tilos, prolóngase durante o mes de marzo.

Prazos concretos

Para nenos e nenas que xa teñan praza neste curso e queiran renova-la para o vindeiro, o prazo de solicitude vai desde o 1 ata o 15 de marzo. quen pida nova praza disporá para facelo do período entre o 17 de marzo e o 1 de abril. Para obter praza de novo ingreso o neno ou nena ten que nacer antes do 31 de xuño.

Que documentación se necesita?

Os documentos para reservar praza xa se lles facilitan ás persoas solicitantes desde os propios centros aos que asisten durante este curso.

Para as solicitudes de novo ingreso a documentación pode obterse en calquera das Escolas Infantís Municipais, na Casa do Concello ou descargalos desde a súa páxina web teo.gal.

Cantas prazas hai?

Tanto en quenda de mañá como de tarde, a escola infantil municipal de Calo dispón de 56 prazas, a

da Ramallosa de 74 prazas e a dos Tilos de 41 prazas, distribuídas en niveis de idade de ata un ano, de un a dous anos e de dous a tres anos.

En Calo dispoñen de 8 prazas para o primeiro grupo, 13 para o segundo e 20 para o terceiro, ademais dun internivel con 15 prazas. Na Ramallosa son 8, 26 e 40 prazas en cada un dos grupos de idade. Nos Tilos as prazas repártense en 8, 13 e 20 por cada grupo.

Como se pode saber máis?

Para quen desexa ter unha información detallada do proceso, o Concello convoca unha reunión explicativa para o xoves 14 de marzo. Será no Salón de Plenos da Casa do Concello ás 19:00 horas. Darase conta de como é o procedemento da matrícula e tamén se poderán recoller os impresos de solicitude de prazas.

Como resolver dúbidas?

Para calquera cuestión que xurda sobre a matrícula nas Escolas Infantís Municipais pódese acudir ao Departamento de Servizos Sociais, ademais de chamar ao teléfono 881 819 356 ou escribir ao correo electrónico eimte@teo.gal •

A renovación de prazas pode efectuarse entre o 1 e o 15 de marzo. Os novos ingresos solicítanse entre o 17 de marzo e o 1 de abril

URBANISMO O Concello solicita na Deputación novas melloras en vías provinciais

Despois do inicio das obras de construción da variante da estrada DP 8202 en Cacheiras, o Concello de Teo solicítalle á Deputación que tramite tamén os proxectos para as melloras e as variantes noutras estradas provinciais.

O primeiro debería ser a execución da variante da Igrexa e do Aído (Luou). Nunha reunión entre a concelleira de Urbanismo de Teo, Uxía Lemus, e o presidente da Deputación, Valentín González Formoso, o goberno provincial comprometeuse a estudar o proxecto co persoal técnico da institución provincial.

Obras en Cacheiras

No encontro na sede da Deputación, Lemus e Formoso ultimaron os detalles das obras de Cacheiras. O proxecto foi contratado por 221.079 euros, ao que hai que sumar os 238.544 euros que a Deputación destinou ás expropiacións necesarias para acometer os traballos da nova variante.

Entre os aspectos que se concretaron na xuntanza, destaca que muros de peche se van retirar, ao estaren afectados polo proxecto. Tamén se estudou a delimitación da zona protexida por Patrimonio, vinculada a unha vivenda incluída no Catálogo de Patrimonio do Plan Xeral de Ordenación Municipal de Teo. Esta delimitación efectúase sempre baixo os criterios técnicos da Xunta e dos servizos municipais.

Os dous obxectivos que se cumpren con estas xestións son manter e protexer o patrimo-



nio teense e ampliar a estrada. Deste xeito a obra non sofre ningunha modificación con respecto ao deseño orixinal proxectado.

Oito meses de prazo

A execución da variante de Cacheiras ten un prazo de oito meses, de acordo coa licitación provincial. Con todo, o Concello agarda que finalicen o antes posible para poder construír posteriormente unha nova senda peonil da Travesía á Igrexa de Cacheiras. O interese municipal para contar canto antes con esta nova infraestrutura é o de eliminar un punto negro para a seguridade viaria no municipio •

A reunión da concelleira de Urbanismo e do presidente da Deputación abordou tamén aspectos da execución da variante da Igrexa de Cacheiras

URBANISMO

Novo aparcadoiro público de 2.000 metros cadrados en Pontevea

O Concello de Teo habilitou un novo espazo de aparcadoiro público en Pontevea (Reis). Ten unha superficie de máis de 2.000 metros cadrados, que foi acondicionada cun investimento duns 30.000 euros. Efectuáronse tarefas de escavación, recheo e compactación cunha capa de saburra de 15 cm de espesor. Tamén se pechou a parcela.

O aparcadoiro sitúase na estrada da Canteira dos Maestros 2. Está limitado a vehículos e furgonetas de ata 3.500 kg de peso máximo autorizado.

O Concello examinou diferentes alternativas e finalmente optou por esta grazas á colaboración desinteresada dun veciño da parroquia. A parcela foi cedida por un prazo de dous anos prorrogable, nun acordo asinado o pasado 11 de xaneiro. A iniciativa dá resposta ás solicitudes reiteradas do sector comercial e da veciñanza de Pontevea.



O Concello e AGADEA crean un servizo de estimulación cognitiva

O Concello de Teo e a Asociación Galega de Axuda a Enfermos con Demencia Tipo Alzheimer (AGADEA) crean un novo servizo de estimulación cognitiva para persoas que xa padecen demencias ou outras deterioracións cognitivas.

O servizo ofrecerase na Casa Común de Cacheiras a partir do 14 de marzo. Atenderá todos os martes e xoves entre as 16:00 e as 19:00 horas. Para asistir hai que contactar co Departamento de Servizos Sociais, chamar ao 981 809 707 ou escribir a servizossociais@teo.gal.

Para resolver dúbidas e coñecer mellor este servizo programouse para o mércores 13 de marzo unha charla informativa. Será na Casa Común de Cacheiras e contará coa participación de profesionais de AGADEA e de Marta Ramos, a terapeuta encargada dos obradoiros de estimulación.

Prevenición

O novo servizo oríentase aos casos nos que a enfermidade xa apareceu. Facíase moi necesario porque se trata de doenzas que ocasionan moito sufrimento en quen a padece e nas súas familias.



Para previr a aparición da deterioración cognitiva, un proceso que se fai máis frecuente segundo se cumpren anos, o Concello de Teo conta desde hai anos con obradoiros de estimulación cognitiva, que se imparten en cinco lugares do municipio e gozan de moi boa aceptación •

Dirixido a persoas con demencias, atenderá todos os martes e xoves entre as 16:00 e as 19:00 horas na Casa Común de Cacheiras

Teo súmase á conmemoración do Día da Síndrome de Down

O Concello de Teo súmase á conmemoración do 21 de marzo, Día da Síndrome de Down, como xeito de apoiar o labor que desenvolven as entidades que traballan para conseguir unha mellor calidade de vida das persoas con esa característica.

As principais iniciativas que se realizarán co gallo da xornada terán como escenario os centros escolares do municipio. Ademais de difundir un cartel que lembra a data, o Concello promoverá a proxección dun vídeo nos colexios e entregará pulseiras conmemorativas para cada alumno ou alumna.

Do mesmo xeito vanse distribuír nos centros educativos os protocolos e outros documentos de traballo que facilita a Federación de Entidades de Síndrome de Down. E para as vindeiras semanas está

previsto convocar unha acción impartida por estas entidades para formar o persoal das Escolas Infantís Municipais sobre as necesidades dos nenos e nenas con esa característica.

Nesta efeméride as entidades da síndrome de Down chaman a reflexionar sobre a vida das persoas con discapacidade intelectual. Hai que partir de que unha sociedade xusta debe facer un esforzo para coñecer e integrar as circunstancias das persoas con síndrome de Down.

O primeiro, de feito, é que saibamos que non se trata dunha enfermidade, senón dun trazo co que nacen algunhas persoas: en vez de dous cromosomas teñen tres no par 21. De aí que o día 21-3 sexa o da súa conmemoración •

Os centros educativos acollerán actividades para concienciar na mellora da calidade de vida do colectivo Down

Teo entra na nova Asociación de Entidades Locais pola Lingua

A nova Asociación de Entidades Locais pola Lingua conta co Concello de Teo como un dos seus integrantes. A entidade, constituída nunha asemblea no Pazo de Raxoi en Santiago, ten como obxectivo desenvolver proxectos conxuntos no ámbito da normalización do idioma.

A asociación está conformada por un total de quince Concellos. Son, ademais de Teo, Santiago, A Baña, Ames, A Coruña, Ribadeo, Ferrol, Narón, Ponteceso, O Grove, Rianxo, Pontevedra, Moaña, Vilagarcía e Rois.

Estes municipios xa viñan colaborando en diversos proxectos e coa nova asociación pretenden reforzar esta colaboración e lograr unha xestión máis eficaz das iniciativas comúns en materia de lingua.

Youtubeir@s

Un deses proxectos en conxunto é o certame Youtubeir@s, que este ano acada a súa terceira edición con máis municipios implicados, novas categorías e premios. Nesta ocasión repartirá 6.500 euros en premios e reforzará o apartado de formación entre a comunidade educativa.

Youtubeir@s, no que tamén colaboran as tres universidades galegas e a Deputación da Coruña, mantén as categorías de vídeo-facermos, vídeo-opinarmos e canle. A elas engade a de vídeo-cantarmos, coa que se recoñecerá e incentivará o talento musical, e premios aos vídeos que destaquen en creatividade, eficiencia comunicativa, calidade técnica e calidade lingüística. O certame prevé tamén un premio



do público, a #propostayoutubeira, para o que se pode propoñer un vídeo da rede social Facebook remitíndoo ao correo electrónico proposata@youtubeiras.gal.

O prazo para participar na edición de Youtubeir@s deste ano é máis amplo e chegará ata o vindeiro 27 de setembro •

A nova entidade foi constituída nunha asemblea no Pazo de Raxoi, en Santiago



PATRIMONIO

Consello Asesor do Parque Compostela Rupestre

O Parque Compostela Rupestre, integrado pola Deputación da Coruña e os Concellos de Ames, Brión, Santiago, Teo e Val do Dubra, constituíu hai uns días o seu Consello Asesor.

No organismo haberá representación de persoal técnico da Xunta, da Deputación, do Concello de Santiago, do Centro Superior de Investigacións Científicas, da Universidade de Santiago, o colectivo A Rula e investigadores especializados.

O Consello Asesor terá entre as súas primeiras tarefas recomendar sobre como facer visitables e recoñecibles pola cidadanía os petróglifos máis relevantes da contorna.

Programa de conmemoración do Día das Mulleres

Acto institucional o 7 de marzo (Concello, 19:30 horas) e excursión para mulleres a Bande e Celanova o 7 de abril

O Concello de Teo conmemorará o 8 de marzo, Día das Mulleres, cun acto institucional programado para o serán do 7 de marzo, o apoio á folga de mulleres do 8 e unha excursión a Celanova e Bande prevista para o 7 de abril.

O acto institucional do día 7 comezará ás 19:30 horas no Salón de Plenos da Casa do Concello. Procederáse á lectura dun manifesto institucional. De seguido MJ Pérez ofrecerá unha actuación musical. E para rematar proxectarase *Noetiña. As mulleres e o mar na Costa da Morte*, un documental de 25 minutos de duración dirixido por Gabriela Amor que obtivo o primeiro premio no certame Luísa Villalta, convocado pola Deputación da Coruña.

En canto á excursión do 7 de abril, o prazo para inscribirse comezará a partir do vindeiro 11 de marzo no enderezo cim@teo.gal.



Con estes actos, o Concello apoia os movementos feministas e corrobora que o 8-M segue sendo un día central nas axendas da nosa sociedade. A xornada conmemora as loitas para acadar e equiparación dos dereitos de homes e mulleres e reclama de xeito activo que sexan dereitos cunha plasmación clara na vida cotiá das mulleres. Teñen que saltar do papel á vida social, laboral, xudicial e política •

Teo participa na creación do directorio #Galegoempresas

O proxecto recolle empresas dos tres municipios que ofrecen produtos e servizos en galego

O Concello de Teo crea xunto aos de Santiago de Compostela e Ames o novo proxecto #Galegoempresas. Trátase dun directorio de empresas radicadas nos tres municipios que ofrecen produtos e servizos en galego.

A concelleira de Cultura de Teo, Pilar Faxil, anima ás empresas locais a sumarse a esta ferramenta, que está dispoñible en galegoempresas.santiagodecompostela.gal. O proxecto #Galegoempresas facilita a súa busca por parte da cidadanía que procura unha oferta comercial sensible coa nosa lingua.

Martíño Noriega, alcalde de Santiago, detalla que un dos propósitos da iniciativa é tamén “facen un recoñecemento á calidade na atención por parte destes negocios”. #Galegoempresas fai que se poida coñecer de xeito rápido e práctico a súa oferta de empresas, o que per-



mitirá ademais planificar accións en materia de lingua para o sector socioeconómico.

A empresa Ágora Aberta, encargada do proxecto, explica que con el as persoas usuarias valoren a atención oral, escrita e telefónica das empresas, que dispoñen nesta ferramenta de recursos para mellorar o uso da lingua •

Comeza o reparto de atraente para trampear a nespra velutina



O Concello de Teo inicia de novo o reparto de doses de líquido atraente contra a nespra velutina. Desde o 6 de marzo e ata o mes de maio todas as persoas interesadas poden obtelo na nave do servizo de Protección Civil. Os seus responsables entregaranos de balde todos os mércores de 17:00 a 19:00 horas e todos os sábados entre as 10:00 e as 12:00 horas.

As raíñas fundadoras desta especie invasora saen durante estas semanas da fase de hibernación na que estiveron durante o inverno. É por tanto unha tempada crucial para instalar as trampas, posto que por cada exemplar que se capture impedírase a posterior formación de niños primarios e secundarios.

Colaboración

Coa distribución gratuíta de doses de atraentes, o Concello pretende facilitar que a poboación colabore tamén durante este ano na construción de trampas por todo o territorio. O material entrégase unicamente a persoas censadas no municipio.

O ciclo biolóxico da especie, que pode variar lixeiramente segundo a climatoloxía do ano,

A partir do 6 de marzo o líquido para as trampas pode recollerse na nave de Protección Civil os mércores pola tarde e os sábados pola mañá

fai que durante marzo e abril as raíñas fundadoras de nespra velutina vaian despertando. A partir de maio constrúen os niños primarios. Por iso é o tempo axeitado para o trampo.

Xa durante os meses do verán a velutina dedícase á caza de presas e medran tamén os niños secundarios. Nesas semanas, por tanto, a loita contra a especie debe centrarse na destrución dos niños. Coa chegada do outono o indicado é un novo trampo, ao entrar na fase de reprodución, previa á morte das raíñas nais, as obreiras e os machos.

O Concello de Teo lembra que para avisar da presenza de niños de nespra velutina cómpre chamar ao teléfono 012 •

AXENDA

Marzo de 2019



Mércores	Servizo de asesoramento sobre a factura eléctrica. Todos os mércores, agás o 20 de marzo, que pasa ao martes 19. En todos os casos de 11:00 a 13:00 h. Salón de Plenos da Casa do Concello.
Venres	Mercado en Cacheiras.
Sábados	Mercado do Alimento Labrego nos Tilos.

2 Sábado. De 16:00 a 20:00 h. **V Torneo de Taekwondo Infantil Concello de Teo.** Técnica, combate e estilo libre. Organizan o Club TKDenodo e o Concello de Teo. Colaboran Artesanía Pampín e a Deputación da Coruña. Pavillón polideportivo de Calo.

6 Mércores. Comezo do **reparto de material atraente** para trampear raíñas de vespa velutina. Ata o mes de maio, os mércores de 17:00 a 19:00 h. e os sábados de 10:00 a 12:00 h. Nave de Protección Civil.

7 Xoves. 19:30 h. **Acto institucional do Día Internacional das Mulleres.** Con lectura de manifesto, actuación musical de MJ Pérez e proxección do documental **Noetía. As mulleres e o mar na Costa da Morte.** Salón de Plenos da Casa do Concello.

9 Sábado. 21:00 h. Teatro. **Loló e mamá,** de De Ste Xeito Producións. Para público adulto. Auditorio Constante Liste.

11 Luns. Inicio do **prazo para anotarse na excursión de mulleres** á zona de Celanova e de Bande do 7 de abril. Inscricións en cim@teo.gal.

12 Martes. **Remata o prazo para inscribirse no DiverTeo de Semana Santa,** aberto desde o 27 de febreiro. O DiverTeo celébrase os días 15, 16, 17 e 22 de abril nos colexios de Calo, A Ramallosa e Os Tilos.

13 Mércores. **Reunión informativa** sobre o novo **programa de estimulación cognitiva** para persoas afectadas por demencia ou deterioración. Casa Común de Cacheiras.

14 Xoves. 12:45 h. **Chapéus há muitos e amores também!** con Sofía Maul (Madeira), dentro do Festival Internacional de Narración Oral Atlántica. IES de Cacheiras.

14 Xoves. 16:00 h. **Comezo do servizo de estimulación cognitiva.** Atenderá os martes e xoves de 16:00 a 19:00 h. Casa Común de Cacheiras.

14 Xoves. 19:00 h. **Charla informativa** para os novos ingresos nas **Escolas Infantís Municipais.** Salón de Plenos do Concello.

16 Sábado. 17:30 h. **Comezo da actividade de fomento da vida saudable.** Itinerario guiado por un monitor de sete quilómetros polo Camiño Portugués partindo de Francos. Cada sábado ata finais de outubro. O programa incluírá breves charlas sobre a actividade física. Inscricións en Servizos Sociais, no 981 809 707 e en servizossociais@teo.gal.

16 Sábado. 18:00 h. **Historias de risa sen presa,** contacontos familiar en castelán con Maricuela Teruel, dentro do Festival Internacional de Narración Oral Atlántica. Biblioteca do Grilo (Cacheiras).

21 Xoves. **Conmemoración do Día Internacional da Síndrome de Down** mediante a difusión de carteis nos centros educativos, a proxección dun vídeo e a distribución de pulseiras conmemorativas.

23 Sábado. **Excursión** a Vilanova da Cerveira e zona norte de Portugal.

23 Sábado. A partir das 17:00 h. **XII Trofeo de Tiro con Arco Concello de Teo.** Recepción de participantes ás 17:00 h. Inicio da competición ás 17:30 h. Organiza o club ADARVE. Colabora o Concello de Teo. Pavillón Ezequiel Mosquera (A Ramallosa).

29 Venres. 19:00 h. Concerto infantil e familiar de Entroido **A gramola Gominola.** Auditorio Constante Liste.